

## N A C R T

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09) i člana 26. Statuta Općine Stari Grad Sarajevo ("Službene novine Kantona Sarajevo", broj: 20/24), na 10. redovnoj sjednici, održanoj dana 25.09.2025. godine, donijelo je

### ODLUKU

#### **O USLOVIMA I NAČINU ODOBRAVANJA JEDNOKRATNE NOVČANE POMOĆI USLJED POŽARA, ZEMLJOTRESA, POPLAVA ILI DRUGIH ELEMENTARNIH NEPOGODA**

#### **I – PREDMET**

##### **Član 1. (Predmet Odluke)**

- (1) Predmet Odluke o uslovima i načinu odobravanja jednokratne novčane pomoći usljed požara, zemljotresa, poplava ili drugih elementarnih nepogoda (u daljem tekstu: Odluka) su uslovi i način dodjele jednokratne novčane pomoći usljed požara, zemljotresa, poplava ili drugih elementarnih nepogoda, maksimalni iznos koji se može dodijeliti, sadržaj javnog poziva i druga pitanja od značaja za postupak dodjele sredstava.
- (2) Gramatički izrazi upotrijebljeni u ovoj Odluci podrazumijevaju oba spola.

##### **Član 2. (Značenje pojedinih pojmova i izraza)**

Pojedini pojmovi i izrazi u smislu ove Odluke imaju sljedeće značenje:

- a) **elementarna nepogoda** je iznenadna i snažna prirodna pojava koja izaziva veliku materijalnu štetu, ugrožava ljudske živote, zdravlje ljudi, životnu sredinu i normalno funkcionisanje društva (poplave, požari, zemljotresi, klizište, suše, oluje, udar groma, snijeg i sl)
- b) **požar** je nekontrolisano sagorjevanje koje je izazvalo materijalnu štetu, ugrozilo ljudske živote i životnu sredinu;
- c) **poplava** je prirodna nepogoda koja nastaje kada voda u velikim količinama prekorači granice svog korita ili kada se izliju velike količine padavina koje izazivaju materijalnu štetu, ugrožava ljudske živote i životnu sredinu;

d) **jednokratna novčana pomoć** je novčani iznos koji se isplaćuje za pomoć pri pojavi požara, poplava ili drugih elementarnih nepogoda u skladu sa odredbama ove Odluke, shodno raspoloživim sredstvima u Budžetu.

## **II – USLOVI ZA DODJELU JEDNOKRATNE NOVČANE POMOĆI**

### **Član 3.**

#### **(Pravo na dodjelu jednokratne novčane pomoći)**

Pravo na dodjelu jednokratne novčane pomoći imaju fizička lica sa prebivalištem ili boravištem na području općine Stari Grad Sarajevo, čija je imovina ili egzistencija ugrožena usljed požara, poplave ili druge elementarne nepogode.

### **Član 4.**

#### **(Uslovi za ostvarivanje prava na jednokratnu novčanu pomoć)**

Uslovi za ostvarivanje prava na jednokratnu novčanu pomoć:

- Prebivalište ili boravište na području općine Stari Grad Sarajevo na dan požara, poplave ili druge elementarne nepogode;
- Pretrpljena materijalna šteta na stambenom objektu, poljoprivrednim kulturama ili drugoj imovini;

## **III – JAVNI POZIV ZA DODJELU FINANSIJSKIH SREDSTAVA ZA DODJELU JEDNOKRATNE NOVČANE POMOĆI**

### **Član 5.**

#### **(Javni poziv)**

- (1) Finansijska sredstva iz Budžeta Općine za jednokratnu novčanu pomoć u slučaju požara, poplava ili druge elementarne nepogode dodjeljuju se isključivo putem Javnog poziva, koji raspisuje Općinski načelnik nakon usvajanja Budžeta za tekuću godinu i donošenja Odluke o raspisivanju Javnog poziva.
- (2) Odlukom iz stava (1) ove Odluke se pokreće postupak dodjele jednokratne novčane pomoći u slučaju požara, poplave ili druge elementarne nepogode, kojom se utvrđuje ukupan iznos sredstava planiran u navedenu svrhu za tekuću godinu, te koja sadrži i druge podatke u skladu sa Smjernicama o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije Bosne i Hercegovine“ broj: 37/24).

- (3) Javni poziv iz stava (1) ovog člana ostaje otvoren do 15.12. tekuće godine.
- (4) Javni poziv se objavljuje na web stranici Općine Stari Grad Sarajevo.
- (5) Odluku i Javni poziv iz stava (1) ovog člana priprema i dostavlja Općinskom načelniku Stručna služba kabineta Općinskog načelnika.

#### **Član 6.** **(Sadržaj Javnog poziva)**

- (1) Javni poziv obavezno sadrži:
  - Naziv organa koji raspisuje poziv;
  - Naznaku da se može aplicirati na javni poziv za dodjelu jednokratne novčane pomoći u slučaju požara, poplave ili druge elementarne nepogode;
  - Spisak dokumentacije koja se obavezno dostavlja uz prijavu;
  - Aplikaciju za prijavu na Javni poziv;
  - Rok za prijavu na Javni poziv;
  - Iznos finansijskih sredstava, planiran u Budžetu za dodjelu jednokratne novčane pomoći u slučaju požara, poplave ili druge elementarne nepogode po Javnom pozivu;
  - Vremenski period za koji se Javni poziv raspisuje;
  - Informacije o načinu komunikacije tokom trajanja Javnog poziva (kontakt osoba, kontakt podaci, način zahtjevanja dodatnih informacija i sl);
  - Druge podatke shodno Smjernicama o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije Bosne i Hercegovine“ broj: 37/24);
- (2) Sastavni dio Javnog poziva je aplikacija za prijavu na isti.

#### **Član 7.** **(Dokumentacija za prijavu na Javni poziv)**

Uz popunjenu aplikaciju, koja je sastavni dio Javnog poziva, za prijavu na isti, aplikant je obavezan dostaviti sljedeću dokumentaciju:

- Dokaz o mjestu prebivališta ili boravišta, ne stariji od 6 (šest mjeseci);
- Dokaz o urednom pravdanju sredstava dodijeljenih u prethodnim godinama iz Budžeta Općine;
- Dokaz o vlasništvu ili drugom pravnom osnovu korištenja predmetne imovine;
- Fotografije ili opis štete,
- Drugu dokumentaciju traženu Javnim pozivom.

#### **IV –KOMISIJA ZA POSTUPANJE PO APLIKACIJAMA NA JAVNI POZIV**

##### **Član 8. (Komisija)**

- (1) Općinski načelnik prije raspisivanja Javnog poziva iz člana 5. ove Odluke, imenuje Komisiju za postupanje po aplikacijama na Javni poziv za dodjelu jednokratne novčane pomoći u slučaju požara, poplava ili druge elementarne nepogode (u daljem tekstu: Komisija).
- (2) Komisija se imenuje na period od 12 (dvanaest) mjeseci i broji 3 (tri) člana, od kojih je jedan predsjednik Komisije, a čine je državni službenici i namještenici Općine Stari Grad Sarajevo.
- (3) Članovi Komisije su obavezno inženjeri građevinske ili arhitektonske struke, koji vrše ocjenu stepena štete na predmetnoj imovini.
- (4) Komisija ima zadatak da svaki mjesec napravi presjek svih pristiglih aplikacija, tako da:
  - Pregleda sve aplikacije sa dostavljenom dokumentacijom;
  - Aplikacije uz koje nije dostavljena obavezna dokumentacija iz člana 7. ove Odluke, odbacuje kao da nisu ni podnesene i o istom obavještava aplikanta pismenim putem;
  - Aplikacije koje ispunjavaju kriterije utvrđene ovom Odlukom dostavlja Općinskom načelniku na dalje postupanje uz preporuku da li da odobri dodjeljivanje sredstava – jednokratna novčana pomoć, uz prijedlog iznosa sredstava koja su opravdana za dodjelu shodno ukupnom broju bodova aplikacije.
- (5) Prilikom sačinjavanja preporuke, Komisija će obavezno uzeti u obzir, te bodovati stepen materijalne štete u slučaju požara, poplave ili elementarne nepogode, bodovima od 1 do 5.

#### **V – ODLUKA O DODJELI FINANSIJSKIH SREDSTAVA – JEDNOKRATNE NOVČANE POMOĆI**

##### **Član 9. (Odluka o dodjeli finansijskih sredstava)**

Općinski načelnik na osnovu preporuke Komisije iz člana 8. ove Odluke donosi odluku kojom odobrava dodjelu finansijskih sredstava – jednokratne novčane pomoći u maksimalnom iznosu od 5.000 KM (pet hiljada konvertibilnih maraka).

##### **Član 10. (Ugovor sa korisnicima finansijskih sredstava)**

- (1) Općinski načelnik po osnovu Odluke iz člana 9. ove Odluke, zaključuje ugovor o dodjeli finansijskih sredstava u vidu jednokratne novčane pomoći u slučaju požara, poplava ili drugih elementarnih nepogoda.
- (2) Ugovor iz stava (1) ovog člana priprema Stručna služba kabineta Općinskog načelnika Općine Stari Grad Sarajevo.

## **VI – ZAVRŠNE ODREDBE**

### **Član 11. (Stupanje na snagu)**

Ova Odluka stupa na snagu osmog dana od dana objavljivabja u "Službenim novinama Kantona Sarajevo".

**PREDSJEDAVAJUĆI  
OPĆINSKOG VIJEĆA STARI GRAD  
SARAJEVO**

**Seid Škaljić**

Broj: 02-45-\_\_\_\_\_/25  
Sarajevo, septembar 2025. godine

## **O B R A Z L O Ž E N J E**

### **PRAVNI OSNOV**

Pravni osnov za donošenje Odluke o uslovima i načinu odobravanja jednokratne novčane pomoći usljed požara, zemljotresa, poplava ili drugih elementarnih nepogoda sadržan je u preambuli iste.

### **RAZLOZI ZA DONOŠENJE ODLUKE**

Elementarne nepogode, poput poplava, požara, klizišta, zemljotresa, oluja i sličnih prirodnih pojava, predstavljaju ozbiljnu prijetnju po život, zdravlje, imovinu građana i normalno funkcionisanje lokalne zajednice. Njihove posljedice često zahtjevaju hitnu reakciju i konkretnu podršku pogođenom stanovništvu, kako bi se ublažile posljedice i omogućio povratak u osnovne životne tokove.

Usvajanjem ove odluke stvaraju se jasni, transparentni i pravični uslovi na osnovu kojih se može odobravati jednokratna novčana pomoć građanima koji su pretrpeli štetu. Odluka omogućava:

- efikasno i brzo reagovanje lokalne samouprave u vanrednim situacijama,
- pravičnu raspodelu sredstava iz budžeta,
- bolju pripremljenost sistema zaštite i spašavanja.

Također, donošenje ove odluke je u skladu sa načelima socijalne zaštite, solidarnosti i odgovornosti lokalne samouprave prema građanima koji se nađu u stanju socijalne potrebe usljed nepogoda, te se omogućava da Općina djeluje, odgovorno i u interesu svih građana, posebno u kriznim i vanrednim okolnostima kada je pomoć najpotrebnija.

### **FINANSIJSKA SREDSTVA**

Za provođenje ove Odluke su potrebna finansijska sredstva, koja će se osigurati u Budžetu Općine Stari Grad Sarajevo.

**PREDLAGAČ:**  
Općinski načelnik  
putem Stručne službe kabineta  
Općinskog načelnika